

Pɔl saba cir kaplāŋ  
**Tesalonifa**  
 ye

*Syaha fla*

<sup>1</sup> Ndoo Pɔl tesē Silaasyi ne, Timuti ne, wii kē too saba nwo yrūhū nɔ wāā ye kē, yii mpāy ye ma Tesaloni wo, ma seefar le wo Tuhufua Yāhā ne tesē wo Yīŋfua Yesu Crise ne. Wo syaha ma ye ye. Yāhā ke ke kayī wāā ye kē tesē ke yrīŋ ne.

*Tesalonifa troho wātāhā tesē* pe Yesu wāta wīi ne pe Yatɛr

<sup>2</sup> Wo syaha wāā Yāhā kē yalebyɛ ye byɛ wīi na. Wo ma maha nii n pāā Yāhā ne, wo sē n faha ye wīi ne ye. Wo loo pye yalebyɛ. <sup>3</sup> Ye Yesu ta ye Yatɛr, ma nii woo laam wīi ya pye. Ye ntāŋ dye yii tāy, loo maha ye ta ye n nii tēŋ tē yii kē. Ye maha koho taha yaha Yesu na. Wo ma nii n pāā Yāhā ne, wo sē n faha koo kai- ngī byɛ wīi ne ye. <sup>4</sup> Wo nna, waa u Yesu kāndeyārwei ne, wo cā ye ntāŋ dye Yāhā tāy ke n ye yāŋ yi, ma yee ye nii ke wām. <sup>5</sup> Too Yesu kapāyīi pāā ye fla na, wo sē le pāā ye ye wo yē kaplāŋ ya ne ye. Yāhā Yrā pye wo ne, koo kē fāŋga n nii wo kaplāŋ na. Wo ba le cā laha ma yee, le Yesu kapāyīi ma cīinde. Too pye ye ne ma naa wo troho tāhā kii syi, ma yee ye waha kayī loo yāā, ye le cā. <sup>6</sup> Ye wāfāy yāā gboho Yesu wīi na, ma sye ma le Yāhā kaplāŋ sya nuhu ne, nuhu tii syi Yāhā Yrā Fāŋga te le nawee- laam wo. Tee loo nde pye ke syi, ye ye troho tāhā wo wāŋ syi dyaŋ tesē wo Yīŋfua Yesu ne. <sup>7</sup> Loo nde ta, Yesu kāndeyārfa mpāy pe ma Maseduan kāntraha kui wo, tesē Yakayi kāntraha kui ne, poo mii byɛ ga waha yāŋ ye

na. <sup>8</sup> Le Yesu wĩ gbe ye fla na, ma cããŋ n gaha Maseduan kãntraha kui byε wo, tesẽ Yakayi kãntraha kui ne. Loo ya sẽ ne ye, tee Yãhã ta ye Yatεr kii syi na, nawee- le luhu teebεhε byε wo. Wii gε saha laa pãã taha le na nantãŋ ye. <sup>9</sup> Too ba ka ye fla na, ye n ba wo yigi yõ mii, nawee- byε loo pãã. Ye mpar wãn tii tee ba ta too ma yãhã, ye too nde byε miy yaha. Cĩnde Yãhã gii ke wãn byε tãhã, ye ye yĩntaha sroŋ koo ya ye, ma ke tẽn tẽ. Yagaa ye ke Dya wãdurbaŋ sẽŋ. Nawee- byε maha loo pãã. <sup>10</sup> Yesu woo kẽ u ma Yãhã Dya, Yãhã u ta u n yir gbã wo, ma dur ba yrãŋ na gbaafa ye. Woo kẽ, tuu wo sya yaha, Yãhã ma n ba wo sãhã wo kapee- wĩ na ye. Yagaa, ye woo wãdurbaŋ sẽŋ, yaliile tuu ga ba yir yãhãyiŋ na u dur ba kãntraha na.

## 2

*P*ol troho wãtãhã Tesalonifa fla na

<sup>1</sup> Yii mpãy tee ma wo nna Yesu kãnde wo, yii gε le cã ma yee wo wãkaŋ ye fla na, ke sẽ yi wãwaha ye, mpãy Yãhã kapãyĩ sya cĩnde. <sup>2</sup> Ye maha cã ma yee, too ba yir klo lii wo pe n yee Filipe ma cã pa ye fla na, pe ba wo tyεhε ma wo nuhu ke fla na. Le sẽ -sẽ ba kai kua wo ye ye. Yãhã fãnga wãã wo kẽ, wo n pa maa le kapãyĩ pãã ye ye. Nawee- busãã n yee poo ga sye wo na; loo naa byε ne, wo waha naa n gaha le kapãyĩ wãpãã ne. <sup>3</sup> Kapãyĩ lii too n pãã nawee- ye, wo sẽ le wã klaha ta kawar wĩ ye, wo sroŋ le wãpãã ne ye ye, wo sẽ maha n kε wo nawee- plaha le kãmpee laa ter wo ye. Aye, kaplãŋ nkãy ke sroŋ Yãhã ye, koo kẽ too n pãã. <sup>4</sup> Koo kẽ, ke wo yãŋ yi ma wo taha ke kapãyĩ wãpãã na nawee- byε ye. Wo sẽ n kε wo wĩ n naa n tãy nawee- ye ye, wo n kε wo wĩ le naa n tãy Yãhã ye, koo gii ke wo laam wũhũ yãŋ. <sup>5</sup> Ye le cã laha ma yee, wo sẽ wo yẽ ta sĩisĩ kawarfuafa dyaŋ ye, wo yẽ kapãn laa sẽ le

yar ma yee, wo koo ngĩ pye war wĩ na ye. Yāhā yīnde ma wo na. <sup>6</sup> Wo sē myaha kε ye ye ye, wo sē maha myaha kε waa ter ye ye. <sup>7</sup> Too sya mii Yesu Crise tēnlεhε, wo sē wii ta fāngafa ye laam wo ye. Aye, ye ntāŋ ba dye wo tāy, nahafua wāŋ syi dyaŋ tuu ne u pii gbihi n yigi. <sup>8</sup> Ye ntāŋ pe dye wo tāy, loo nde ta, wo n ba yεr le Yāhā kapāyĩ wāyar wĩ na ye ye. Loo ya sē ne ye, wo ba yεr wāku wĩ na ye kē. Ye wĩ ba gboho tεr wo laam wo, koo kē! <sup>9</sup> Yii mpāy ye ma Yesu kāndeyārfa, tēn lii too naa n tē, ma naa wāfāy gii fāy, ye le cā: Too pye ye ne ma naa le Yāhā kapāyĩ yar ye na, wo naa tēn tē ke yai ke yīmper. Wo sē naa ye fāy laa gε ne ye. <sup>10</sup> Yii mpāy tee Yesu ta ye Yatεr, too pye ye ne, wo troho wātāhā ter pye gbεgbε ma maha ba sroŋ, wāteepye sē maha pye le na ye. Ye byε le yāā yīnde ne, le maha pye Yāhā yīnde na. <sup>11</sup> Ye cā ma yee, wo pye yii nanem byε ne, mii tuhufua dyaŋ u pii ne. <sup>12</sup> Wo naa ye laam gbā, wo naa ye laam yīn ye kē, wo naa ye nar ye naa ye troho tāhā Yāhā yor wo, Yāhā koo kē ke ye yee dye ke Yai wo, ma maha ye ta ye n ke nayōr yāā.

*Wāfāy sē* waha Tesalonifa ta pe n le Yāhā kapāyĩ sye ye

<sup>13</sup> Wo maha syaha wāā Yāhā kē yalebyε laa ter ne, loo ne nde: Too le Yāhā kaplāŋ pāā ye ye, ye le luhu. Ye sē le sya mii naweete yē kapān ya dyaŋ ye, ye le sya ma cā Yāhā yē kapān ne. Le -sē ma cīinde, Yāhā yē kapān ne. Loo kapān nde tēn tē ye laam wo, yii mpāy tee Yesu ta ye Yatεr. <sup>14</sup> Yesu kāndeyārfa yawārfa mpāy pe ma Yudε kui wo, poofa mii, pe seefar le Yesu Crise ne. Pe wāfāy yāā gboho le Yāhā kapāyĩ wĩ na. Wo nna, ye yāŋ pe na, koo kē wāfāy gii ke ye dye yagaa, ye ke sya laanyīn ne. Wānuhu gii ye terfa pe ye nuhu yagaa, Yiifee- naa pe Yudε Yesu kāndeyārfa nuhu koo syi. <sup>15</sup> Poo Yiifee- ya kē, pe naa pe

faale Yāhā kaplāṅ tōrfa boo, ma sya ba wo Yīṅfua Yesu boo. Yagaa, pe maha mii pe wo kar teebεhε byε wo. Pe wīi sye Yāhā ye, pe ma nawee- byε napīi-! <sup>16</sup> Koo kē, pe n nii n sye wo na fānga ne ma yee, mpāy pe wee Yiifee- ye, wo ma n le Yāhā kapāyīi pāā pe ye pe n sya yaha ye. Pe yagaa kapee- nkāy pe n pye, ma le taha faale cāā wūhū na, koo ngīi byε n ta, Yāhā laam n war pe ne.

Pɔl n traha u maha Tesalonifa yāā

<sup>17</sup> Wo nna, wo cāāṅ wii na, ma dey wii na, wo laam sē -sē faha ye na ye. Loo ne, le sē ma- ye, ye wāyāā laam n wo yigi fānga ne. <sup>18</sup> Wo naa n traha wo dur ga ye fla na. Tεhε syāṅ byε, ndoo Pɔl yee, n ga ka ye fla na, Setane sāndāpee yīṅfua n yer tā wo na. <sup>19</sup> Wo Yīṅfua Yesu ma'a dur ba per gii, ye wīi sē na, le ga ba nii nuhu wīi wo ye, le ba wo myaha gboho wo Yīṅfua Yesu ye. Āwā, wo koho taha yaha yii poo na, wo myaha n waha ba gboho Yesu ye. <sup>20</sup> Yii me tee ga ba ta wo n cā wo yee, wo yia wo naa nuhu di.

### 3

<sup>1</sup> Ye wāyāā wīi le gboho tēr wo laam wo, wo n gblihi laa ma kuee wii ya klo nde wo pe n yee Atεn, <sup>2</sup> ma wo nampyeṅ Timuti nɔ wāā u ga ye yāṅ. Timuti tēn tē wo ne Yāhā kē, le Yāhā Yīndefua Crise kapāyīi wāyar ne nawee- na. Tee mii Yesu kāndeyārfa, wo u lεhε wāā ye ye, u ga ye ta ye n fānga yāā ye naa le Yesu kānde yār, tuu maha ye ta ye n naa n gaha yahasee ye le wo nuhu ne. <sup>3</sup> Loo na, pe napīi- pe wo byε fāy wāfāy gii ne, koo wāfāy nge ma n waha yia ke ye laam wlāhā ye. Yii gε le cā ma yee, koo wāfāy nge saha kε laa wii Yesu kāndeyārfa yīṅ na ye. Yāhā kē ke loo ta. <sup>4</sup> Ye cā, too pye ye fla na nantāṅ, wo ba ye cāā yar yaha ma yee, pe napīi- ga ba naa wo byε fāy. Loo le n pye yagaa wo byε na, ye n nii le yāā. <sup>5</sup> Loo ne, ye wāyāā wīi le gboho

tɛr ta laam wo, ta n gblihi laa ma Timuti lɛhɛ wãã ye ye u ga ye yãŋ, ye ma ye n pye mii le Yesu kãnde wãyãr ne. N ba fya ma yee, laa na sãndãpee yĩŋfua ga pye u ye tyĩn yi kãã le Yesu kãnde wo, wo tɛn byɛ n nii tɛwai ye fla na.

### Pɔl laam yĩn Tesalonifa ne

<sup>6</sup> Yagaa, Timuti tuu ka maa ye yãŋ, ma dur ba wo ye, u kayũhũ pãã wo ye, ye troho wãtãhã wĩ na le Yesu kãnde wo, tesɛ ye ntãŋ wãdye wĩ ne yii tãy. U wo pye ma yee, wo wĩ ma le tãy nii ye laam wo. U maha yee ye wãyãã laam ke wo yigi mii, wo wãyãã laam bya ye yigi ke syi dyaŋ. <sup>7</sup> Wo nna, kapee- nkãy ke wo dye, ma suhu wãfãy gii ne ke ma wo na, too -sɛ Timuti kaplãŋ ngĩ luhu ye wãyãr wĩ na le Yesu kãnde wo, loo nde wo laam yĩn. <sup>8</sup> Yagaa, too cã ye yii plãhã ma kuee le Yesu kãnde wo, loo nde wo kadye sãhã wo kɛ, ma maha fãnga gaa taha wo na. <sup>9</sup> Yãhã wĩ gboho wo laam wo, ke maha ta ye wĩ n nii wo ye nuhu wĩ ma sya ga ta tɛr. Wo syaha kloŋ tɛr Yãhã na loo nde ne. <sup>10</sup> Ke yai ke yĩmper, wo ke nar wo laam byɛ ne, ke le sya wo ye, wo n waha ka wo ga ye yãã yĩnde ne. Laa ma pye, le ye wlãhã ye Yesu kãnde wãyãr wĩ ne, wo n ga le gbihi ye kɛ. <sup>11</sup> Wo Tuhufua Yãhã koo gɛ tesɛ wo Yĩŋfua Yesu ne, pe le sya pe kãnde gbihi ta, wo n waha ka wo ga ye yãã! <sup>12</sup> Wo Yĩŋfua u ta kaa n naa n taha ye ntãŋ wãdyen na yii tãy tesɛ nawee-byɛ ntãŋ wãdyen ne ye tãy, le n sya ba nii mii ye ntãŋ pe dye gboho wo tãy mii. <sup>13</sup> Tee wo Yĩŋfua ta ye Yatɛr, u ta u wĩ n nii gbãã kuee ye laam wo, laa wãpee ma n pye ye laam wo ye. Loo na, wo Yĩŋfua Yesu ma ba dur ba mpãy byɛ ne pe ma u kur ye, ye laam byɛ ga ba nii gbɛgbɛ wo Tuhufua Yãhã yahasee ye. Ngaa ma n waha wo cɛr Yãhã na ye.

## 4

*Troho wātāhā gii syi ter ke n tǎy Yāhā ye*

<sup>1</sup> Wo nna, yagaa too ye klaha ye yai ye naa ye troho tǎhā mii le n waha naa n tǎy Yāhā ye, wo cā loo ne tee n pye. Yagaa, waa ye nar waha wī nen nde ne wo Yīnfua Yesu myaha na: Tee ye troho tǎhā mii, -ye kaa gbihi taha naa n gaha ke wātāhā na! <sup>2</sup> Kai- nkāy wo Yīnfua Yesu yee tee yai ye naa n pye, wo ke yar ye na. Ye ke cā.

<sup>3</sup> Lii le ma Yāhā laam wī loo ne nde: -Ye ye troho wātāhā ter ta, ke n naa n yō, ke naa n nii gbεgbε, -tee yii yigi tyatyāhā kuε ye. <sup>4</sup> Ye byε, -ye naa kacān yāā ye ca kuε ye, -ye naa nagboho ta pe na. Lii le yō Yāhā ye, -ye naa loo pye! <sup>5</sup> Ye ma syi ye flefle n gboho tēr ye na mii nawee- mpāy dyaŋ pe sē cīnde Yāhā cā ye. <sup>6</sup> Waa ma syi u kapee pye u nampyer na loo nde ne ye! Waa ma syi u dugu u nampyer na kai laa wo ye. Wo ye yar waha wa loo nde ne ma yee, mpāy pe koo kapee- ngī ter pye, Yīnfua ga ba pe pēn. <sup>7</sup> Ye sē yāā, Yāhā sē wo yee ma yee, wo naa wo troho tǎhā tyatyāhā yor wo ye, ke wo yee ma yee, wo wo troho wātāhā ter ta ke n naa laha kānkai- byε wo. Loo le n tǎy Yāhā ye. <sup>8</sup> Loo ne, wii ma loo kaklaha wī nen nde sye, naweete kaklaha sē kē tuu sye ye, Yāhā kaklaha kē tuu sye, Yāhā gii ke ke Yrā le ye laam wo.

<sup>9</sup> Tee mii Yesu kāndeyārfa, ye ntāŋ wādye wī na yii tǎy, laa kafuē wee tē ga maha yrūhū yar ye na ye. Yāhā gε ye yar wa, tee ga pye mii, ye wī naa n tǎy yii ye, ye le cā.

<sup>10</sup> Loo gε ne tee n pye ye Yesu kāndeyārwai mpāy byε ne pe ma Maseduan kāntraha kui kur byε wo. Wo nna, wo maha le nar ye ye, -ye maha kaa taha loo nde wāpyer na.

<sup>11</sup> -Ye naa n kε ye naa ye troho tǎhā laanyīn ne, ye sē yai ye nii teger waa ye ye, ye yai ye naa ye yīŋ kai- gbihi yii ya. -Ye naa tēŋ tē yii ya ye naa ye yē digi kε, mii too ba ye

yar wa le ne mii. <sup>12</sup>Ye ma nii koo pye, waa saa naa n fāy ye yē wāwoo wīi ne ye, tesē mpāy pe wee Yesu kāndeyārfa ye, pe ma n laa yāā ye na ye.

*Yesu ga dur ba kântraha na mii*

<sup>13</sup>Wo nna, mpāy pe ku tēr wa, lii le ga ba pe dye, wo n traha ye cīinde cā loo nde na. Loo na, ye laam saa wlāhā naa n nii yalebyε mii mpāy dyaŋ, pe sē koho taha yaha cīinde yrā na ye, cīinde yrā lii wākuayāā wee le na ye.

<sup>14</sup>Wo cā ma yee, Yesu ku ma dur, ma yir gbā wo, ma pa yrāŋ na gbaafa ye. Loo ta wo n maha cā ma yee, mpāy pe Yesu ta pe Yatēr ma sya ba ku, Yāhā ga ba poo byε ta pe n yir gbā wo, pe dur ba yrāŋ na, pe ba nii Yesu ne. <sup>15</sup>Wo Yīŋfua wo yar kai- nkāy ne, waa ke pāā ye ye: Yīŋfua ma ba dur n pai, wii mpāy too sē ku wa ye, wo saa ba pye mpāy yahasee ye pe ku tēr wa ye. <sup>16</sup>Wo ga ba luhu tēŋ gaa ne mii waa dyaŋ tuu gbey fānga ne. Wo ga ba luhu yāhāyīŋ tēnlεε yīŋfua waa yīmbui ne. Wo ga ba luhu Yāhā tūūtūū wāwuu ne. Yīŋfua gε ga ba yir yāhāyīŋ na u tege ba. Mpāy pe ba Yesu ta pe Yatēr ma sya ba ku, poofa ga ba yir wa gbā wo, pe dur ba yrāŋ na, pe yahasee sya.

<sup>17</sup>Loo kur ye, wii mpāy too ga ba pye nantāŋ yrāŋ na le yale wo, wo bya waa ba yir taha pe na yāhāsyōr wo, wo ga Yīŋfua wāā ncha ye. Loo na, wo ga ba kuee yai tāŋ Yīŋfua ne. <sup>18</sup>Tee mii ye kaplāŋ ngīi luhu, -ye naa ke pāā yii ye, ye naa ye laam yīn loo nde ne!

## 5

*-Ye yii yigi, Yīŋfua wādurbaŋ ga ba ye fe gbe!*

<sup>1</sup>Wo nna, kai- ngīi pyeyale tesē ke pyeper ne, ye sē n kε n koo yrūhū yar ye na ye. <sup>2</sup>Yii gε le cā laha ma yee, waa saa ba Yīŋfua durbaper cā ye. Koo per ga ba pye mii yuhu wāŋ syi dyaŋ tuu ne pa yīmper wo, waa gε saa cā

ye. <sup>3</sup> Yaliile nawee- ga ba naa n yee: Yagaa woo, laa wāpee wee ye, ntāncɛr wīi laa wee nantāŋ ye, loo yale -sē ne, le kapeengbāy ga pe fe gbe le pe dye. Pe saa ba wloho yi le wo ye, le ga ba nii mii calaifua wāŋ syi dyaŋ, laha ke ne u fe gbe wāyaa ne. <sup>4</sup> Yii poo na, wo nna, tee laa cā Yāhā wīi na, ke per saa waha ye fe gbe yuhu wāŋ syi dyaŋ ye. <sup>5</sup> Ye sē yāā, ye byɛ ye ma cāā- nawee-, ye ma yai nawee-, kai nkāy ke yō gbaa na, ye koo pye. Wii mpāy too Yesu ta wo Yatɛr, yīmper wohofa sē me wo ne ye, wamfa sē me wo ne ye. <sup>6</sup> Loo na, wo ma syi wo naa napar pye wo sā wāy naa n faha wo Yīŋfua Yesu wīi ne mii mpāy dyaŋ pe sē cīinde Yāhā cā ye. Wo yai wo naa wo laam too yalebyɛ wo Yīŋfua Yesu wīi ne, wo yai wo naa kacān yāā wii na. <sup>7</sup> Yīmper kē nawee- pe sā n wāy, yīmper maha kē nawee- pe sēm wo n tɛr, ma n faha pe ya yaha. <sup>8</sup> Wii na, wo ma yai nawee-, wo yai wo naa kacān yāā wii na. Wo ma Yesu ta wo Yatɛr ma maha ta, wo ntāŋ nii n dye wii tāy, le ga nii wo ye mii ntēn nayroho dyaŋ naan miyfa pe le paha tā kadye na. Wo ma wo koho taha yaha wo wāsyayaha wīi na, le ga nii wo ye mii ntēn yīncigi dyaŋ naan miyfa pe le paha tā yīŋ na. <sup>9</sup> Ye sē yāā, Yāhā sē wo yāŋ yi ma yee, ke kasāhā te ba too wo na ye. Ke wo yāŋ yi, ma yee wo wāsyayaha yāā wo Yīŋfua Yesu Crise kāmāy na. <sup>10</sup> U Syayahafua ku wo wīi na, ma yee wo ba nii u ne yaliile wo u ma ba dur ba. U dur ba wo yāā yrāŋ woo, u dur ba wo yāā too ku woo, loo wīi nen ya ne, wo ga ba nii u ne. <sup>11</sup> Loo na, -ye naa ye laam gbā, -tee naa koho le yii ye, ye naa kaa taha ye troho wātāhā na Yesu Crise kānde wo!

*Ke kai- wāyar kuasaha*

<sup>12</sup> Mpāy pe Yīŋfua tēn tē ye kē, ma ye troho wātāhā sroŋ ye kē Yesu kānde wo, ma ye yi n kāā kapee- wāpyeŋ kānde wo, wo nna, wo ye nar, -ye naa nagboho ta pe na!



<sup>13</sup> Pe tēn lii tē ye kē, ye tyii loo nde n ta, pe wīi n naa n tāy ye ye. -Ye naa laanyīn wūhū pye yii kē tesē ye nampyeŋ-byε ne! <sup>14</sup> Wo nna, wo ye byε nar, mpāy pe tēn wīi sye, -ye pe yar le ne ye yee, kayī sē ne pe dye yεr ye. Mpāy pe ma, laa le pe fāy, -ye naa pe laam yīn! Mpāy laam pe ma fāhāfāhā kapee- wāpyeŋ kuε ye, -ye naa pe yāŋ ye naa laantor kaplāŋ le pe laam wo. -Ye naa ye laam yīn poo mii byε ne! <sup>15</sup> -Ye naa yii yigi: Ye nampyeŋ- ma kapee pye ye na, ye ma syi ye le dur u kē ye! -Ye naa kayī loo kε, ye naa n pye yii kē tesē nawee- byε ne. <sup>16</sup> -Ye yāŋ, -ye naa nuhu di yalebya, <sup>17</sup> -tee naa n pāā Yāhā ne yalebya, <sup>18</sup> -tee naa syaha wāā Yāhā kē kānkai- kur byε wo! -Ye naa ye troho tāhā koo syi Yesu Crise kānde wo, yii mpāy tee seefar le Yesu Crise ne. Koo ke ma Yāhā laam wūhū. <sup>19</sup> Yāhā Yrā lii Yāhā le le ye laam wo, le ma mii naa dyaŋ Yāhā ke tar ye laam wo. -Ye naa n luhu le yīmbui nde ye, ke naa ma n fege ye! <sup>20</sup> Wii ma Yāhā kapān laa luhu u laam wo ma le tōr, ye ma syi ye yee, yīŋ wee le na ye. <sup>21</sup> -Ye yāŋ naa n le kai- byε wo, lii ma sroŋ, -ye loo gbe! <sup>22</sup> Lii le -sē pee, -ye loo yāā ye le ta yaha!

*Syaha tesē* Yāhā wānar fla ne

<sup>23</sup> Yāhā gii ke n pai yrīŋ ne, ke ta ye n kuee yai tāŋ ke koho wo. Ke ye laam byε ta pe n kuee yai tāŋ gbεgbε, ye yrā ne, ye kadye bya ne, wo Yīŋfua Yesu Crise n sya ba dur ba! <sup>24</sup> Yāhā koo ke ga le pye ye kē. Ye sē yāā, Yāhā sē n yi ke kapān kur ye ye. <sup>25</sup> Wo nna, ye bya, -tee naa Yāhā nar wo kē yii ndoŋ! <sup>26</sup> Yesu kāndeyārfa mpāy byε pe ma ye fla na, ye pe byε gbihi syar wo kē, ye pe yar wo byε ma tuhufua nen pii, wo ntāŋ dye wii tāy. <sup>27</sup> N ye nar Yīŋfua myaha ne, -ye saba nwo kal Yesu kāndeyārfa byε n luhu. <sup>28</sup> Wo Yīŋfua Yesu Crise u kaa taha ye na.

YĀHĀ NAAMBIYĀRFĀN SABA

Karaboro, Eastern: YĀHĀ NAAMBIYĀRFĀN SABA New Testament  
copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

---

PDF generated using Haiola and XeLaTeX on 14 Jun 2022 from source files dated 13 Jun  
2022

15120496-00e2-503a-8d40-2d7cfdc1ba5b